

U javnom obraćanju ovdašnjih predstavnika vjerskih zajednica dominantne su teme o dijalogu, toleranciji i uzajamnom poštivanju. U svrhu promocije međureligijskog dijaloga štampaju se različite publikacije, održavaju se diskusije i seminari, pokreću se posjete i susreti znamenitih vjerskih poglavara. Na kojim načelima graditi dijalog među objavljenim religijama? Koje vrijednosti i ciljeve zastupa islam kada je u pitanju konstruktivan dijalog među religijama? O dijalogu među religijama u rubrici Putokazi u Novom Muallimu piše Ahmet Alibašić. U rubrici Sagledavanja objavljujemo pet tekstova: *Balansiranje između slobode govora i prava na religiju u XXI stoljeću*, autora Samedina Kadića, *Kritika ideologija u Busuladžićevom mišljenju*, autora hfz. Mevludina Dizdarevića, *Idžtihad u diskursu Huseina Đoze*, autora hfz. Midhata Beganovića, *Kršenje ljudskih prava u Bosni i Hercegovini u periodu od 1996. do 2006. godine*, autora Mirsada Cvrka, *Djeca Palestine u svijetlu konvencije o pravima djeteta*, autora Elme Khan i *Odnos između islama i kršćanstva u Evropi: prošlost, sadašnjost i budućnost*, autora Hansa Köchlhera. U rubrici Muallim objavljujemo veoma temeljitu, opsežnu i sadržajnu pripremu o suri *En-Nasr* za nastavni sat iz vjeronauke. Autor ove nastavne pripreme je Samir Dedić. U istoj rubrici imate priliku pročitati tekst Selvire Draganović pod naslovom *Vuk u janjećoj koži: psihološki profil psihopate* i tekst Mirsada Arnautalić *Analiza zastupljenosti tekstova o halalu i haramu u mektepskoj nastavi*. Priču poznatog turskog pisca Nuretina Topcu *Moj put u vječnost* objavljujemo u rubrici Muallimov esej. U rubrici Historija obrazovanja donosimo tekst Amira Mehooljića *Hajrudin ef. Abdurahmanović - lik i djelo*, tekst Elvira Duranovića *Islamska vjeronauka u osnovnim školama na području kotarskog vakufsko-mearifskog povjerenstva u Bugojnu između dva rata* i tekst Mine Kujović *Hasnija Berberović-zaboravljena učiteljica*. U rubrici Hutba imate priliku pročitati dvije hutbe koje potpisuju hatibi hfz. Sabahudin ef. Skejić i Bilal ef. Hodžić. Recenzentski i kritički osvrt o hutbama ovaj put iznose Fikret ef. Pašanović i hafiz Senaid Zajimović.

Rubriku Forum posvetili smo aktuelnom pitanju školovanja i planiranja kadrova u visokim školskim ustanovama Islamske zajednice i realnom sagledavanju i procjenjivanju mogućnosti njihovog adekvatnog zapošljavanja. Svoja gledišta o ovom pitanju iznose profesori Enes Karić i Džemaludin Latić, i rukovodilac Vjersko-prosvjetne službe Rijasetu Islamske zajednice Muharem Omerdić. Senada Tahirović u tekstu *Muslimanska teologinja u bh. društvu - pozicija i uloga* razmatra mogućnosti, ograničenja i perspektive angažiranosti svršenica islamskog teološkog studija u našem društvu. U Forumu objavljujemo i dva priloga: redakcijski prilog koji se bavi statističkim pokazateljima i projekcijama o broju upisanih studenata i svršenika studija islamskih fakulteta i trenutnim stanjem na tržištu rada u Islamskoj zajednici i prilog *Informacija o upisnoj politici na visokoškolskim ustanovama u F BiH i usklađivanje sa potrebama tržišta rada*, (dio) Federalnog ministarstva obrazovanja i nauke, Sektor za visoko obrazovanje, nauke i tehnologiju iz 2009. godine.